

### 3-§. Xususiy kapital to'g'risidagi hisobot qismiga tushuntirishlar

11. Xususiy kapital to'g'risidagi hisobotga tushuntirishda ishtirokchining chiqib ketishi, aksiyadorlik jamiyati tomonidan aksiyalarning sotib olinishi yoki sotib olingan aksiyalarning bekor qilinishi, aksiyalar nominal qiymatining pasayishi yoki boshqa sabablarga ko'ra xo'jalik yurituvchi sub'yekt xususiy kapitalining kamayib ketganligi haqidagi ma'lumotlar keltiriladi.

12. Aksiyadorlik jamiyatlari xususiy kapital to'g'risidagi hisobotga tushuntirishda quyidagilar haqidagi axborotlarni keltiradilar:

a) obuna amalga oshirilishi nazarda tutilayotgan aksiyalarning umumiy soni va nominal qiymati;

b) nazarda tutilgan miqdorlar bilan taqqoslaganda obuna amalga oshirilgan aksiyalarning umumiy miqdori va nominal qiymati;

v) aksiyalarga obunaning borishida olingan mablag'larning umumiy summasi;

g) ayrim turlar va toifalar bo'yicha ustav kapitali tarkibidagi aksiyalar;

d) imtiyozli aksiyalar bo'yicha to'lanmagan jamlangan dividendlar summasi;

ye) aksiyalar ko'rinishida to'lanadigan dividendlar, xususan, to'lanadigan aksiyalarning soni va qiymati, shuningdek, ularning turlari yoki toifalari to'g'risida;

j) hisobot davrida yuz bergan maydalash yoki qo'shib yuborishlar va aksiyalarning maydalanishi yoki qo'shib yuborilishigacha va undan keyingi aksiyalarning nominal qiymati to'g'risidagi.

13. Aksiyalarga obuna bo'lishdan olingan mablag'larning umumiy summasi, tushuntirish qismida quyidagilar kesimida keltiriladi:

a) aksiyalar uchun to'lov sifatida kiritilgan barcha pul mablag'lari, aksiyalar sonini ko'rsatgan holda;

b) aksiyalar uchun to'lov sifatida kiritilgan mol-mulkning qiymat bahosi, aksiyalar sonini ko'rsatgan holda;

v) aksiyalar uchun to'lov sifatida kiritilgan chet el valyutasining umumiy summasi, aksiyalar soni va valyuta hisobga kiritilgan kursni ko'rsatgan holda.

14. Ustav kapitali tarkibidagi aksiyalar to'g'risidagi axborotlar tushuntirishda alohida turlari va toifalari bo'yicha keltiriladi:

a) chiqarilgan aksiyalar soni, ustav kapitalining to'lanmagan qismini ko'rsatgan holda;

b) aksiyaning nominal qiymati;

v) hisobot davri mobaynida muomalada bo'lgan aksiyalar sonidagi o'zgarishlar;

g) aksiyalar bilan bog'liq huquqlar, imtiyozlar va cheklashlar, shu jumladan dividendlarning taqsimlanishi va kapitalning qaytarib berilishi bo'yicha cheklashlar;

d) jamiyatning o'ziga, uning shu'ba va uyushgan korxonalariga tegishli aksiyalar;

ye) ta'sischilar ro'yxati va ular egalik qilayotgan aksiyalar soni;

j) ijroiya organ a'zolarining mulki bo'lgan aksiyalar soni;

z) opsiyonlar va boshqa shartnomalarga muvofiq chiqarish uchun zaxiralashtirilgan aksiyalar, ularning muddatlari va summalarini ko'rsatgan holda;

i) konvertasiya qilinadigan (aksiyalarga yoki obligasiyalarga) aksiyalarning soni va nominal qiymati hamda ushbu aksiyalarning qarzga oid qimmatli qog'ozlarga konvertasiya qilingan hollarda yuzaga kelishi mumkin bo'lgan majburiyatlar.

15. Boshqa barcha xo'jalik yurituvchi sub'yektlar moliyaviy hisobotlar izohlarida quyidagilar axborotlarni keltiradi:

a) mulk egalari o'rtasida ustav kapitalidagi ulushlarning taqsimlanishi;

b) ushbu ulushlarga tegishli huquqlar, imtiyozlar yoki cheklashlar;

v) ustav kapitalidagi mulk egalari ulushi tarkibidagi o'zgarishlar.

16. Xususiy kapital to'g'risidagi hisobot qismiga tushuntirish xati O'zbekiston Respublikasi Buxgalteriya hisobining [milliy standarti](#) (1-son BHMS) «Hisob siyosati va moliyaviy hisobot» (ro'yxat raqami 474, 1998 yil 14 avgust)da belgilangan talablarga muvofiq tuziladi.

*(O'zbekiston Respublikasi Qonun hujjatlari to'plami,  
2004 y., 14-son, 174-modda)*